

याकोबाने लिहिलेले पत्र याकोबनी लिखेल पत्र वळख

याकोबनं पत्र हाई पुस्तक एक याकोब नावना माणुसनी लिखेल शे. तो येशू ख्रिस्तना भाऊ व्हता. तो मंडळीसना पुढारी अनी यरुशलेम मंडळी प्रेषित १५:१३ कमेटीना सदस्य व्हता. प्रेषित पौल त्याले कायम मंडळीना स्तंभ असा सांगस. गलती २:१ तज्ञ लोकसना ईचारनुसार याकोबनी हाई पत्र ख्रिस्त जन्मना ५० वरीस नंतर लिखेल शे. जवय याकोब यरुशलेम मातील मंडळीना पुढारी व्हता तवय त्यानी तणे राहतांना हाई पुस्तक लिखेल व्हतं.

त्यानी त्याना पुस्तकमा “राष्ट्रसमा पसरेल बारा वंशसवन” अस नमुद करस. याकोबनं पत्र या पुस्तकमातील धडा सर्व ख्रिस्ती लोकसकरता लागू व्हतस. पण “बारा वंश” १:१ या शब्दना वापर करामुये हाई शक्य व्हवु शकस की, याकोब हाई पत्र थेट यहूदी ख्रिस्ती लोकसले लिखी राहींता कारण हाई पुस्तक वाचणारा एक विशेष गटपावत पोहचाडाकरता व्हतं. त्यामातीन बराच विषयसवर चर्चा व्हयनी. याकोबनी ईश्वास अनी कृती यासनामातील संबंधवर भर देयल शे खरा ईश्वास प्रीतीमा दखाडामा ई. २:१७. त्यानी श्रीमंत लोकसकरता पक्षपात दखाडाकरता चेतावणी देयल व्हती, २:१-४ अनी आपण कसं बोलांले पाहिजे यानाबद्दल सावध रहावाले सांगस. ३:१-१२

रूपरेषा

१. याकोब आपला वाचकसले नमस्कार करस. १:१
२. पुढे त्यानी ख्रिस्ती लोकसले जवय दुःख सहन करनं पडी तवय त्यासले धीरतीन प्रोत्साहन करस. १:२-२७
३. नंतर कृती करीसन ईश्वास दखाडाकरता ईश्वास व्यक्त करनं आवश्यक शे. २:१-२६
४. त्यानंतर शब्द कितला शक्तीशाली रहास हाई तो सांगस. ३:१-१२
५. नंतर याकोब समजाडीन सांगस की, ईश्वरनं ज्ञान जगनी बुध्दीपेक्षा कसं येगळं शे हाई सांगस. ३:१३; ४:१०
६. पुढे त्यानी आपला वाचकसले अभिमान करानी चेतावणी दिधी. ४:११; ५:६
७. याकोबनी काही सामान्य सूचना दिसन आपलं पुस्तक पूर्ण करं. ५:७-२०

१ ☆देवना अनी प्रभु येशु ख्रिस्तना दास याकोब याना कडतीन बारा वंशना पांगेल लोकसले सलाम;

ईश्व्वास अनी ज्ञान

२ मना भाऊ अनी बहिणीसवन, बराच प्रकारना संकटसघाई तुमनी परिक्षा व्हस तरी तुम्हीन आनंदच माना.

३ तुमले माहित शे की, तुम्हीन ईश्व्वासनी परिक्षामा यशस्वी व्हवामुये तुमनामा धीर तयार व्हस;

४ अनी धीरले आपलं काम पुरं करू घा, यानाकरता की तुम्हीन कसामाच कमी नही पडता तयार अनी परिपूर्ण व्हावे पाहिजे.

५ तुमनापैकी जो कोणी ज्ञानमा कमी व्हई त्यानी ते देवकडे मांगानं, म्हणजे ते त्याले देवामा ई; कारण देव सर्वासले कृपाघाई अनी उदारतातीन देस;

६ पण त्यानी काही संशय नही धरता ईश्व्वासतीन मांगानं; संशय धरणारा बाराघाई ढकलेल अनं उंच ऊठणारा लाटासनामायक शे.

७ असा माणुस आपले प्रभुकडतीन काहीतरी भेटी अस त्यानी समजी लेवाले नको.

८ कारण असा माणुस दोन मनना र्हास अनी आपला सर्व कामसमा चंचल र्हास.

गरीबी अनी श्रीमंती

९ गरीबीमा राहणारा ईश्व्वासी लोकसनी देव त्यासले उच्च करी, यानाबद्दल त्यासनी आनंद कराले पाहिजे.

१० अनी श्रीमंतसनी देव त्यासले गरीबीमा टाकस तवय त्यासनी आनंद कराले पाहिजे; कारण त्या जंगली फुलना गवतनामायक नष्ट व्हातीन☆.

११ सुर्य फटकामा उगायना, उष्णताघाई गवतले सुकाडी टाकं अनी त्यासना फुले गळी गयात अनी त्यासनी सुंदरतानी शोभा गई असच श्रीमंत बी आपला व्यवसायना भरमा कोमाई जाई.

परिक्षा अनी मोह

१२ जो माणुस परिक्षामा टिकस तो धन्य, कारण आपलावर प्रीती कराकरता देवनी देयल जिवनमुकूट परिक्षामा यशस्वी व्हवानंतर त्याले भेटी.

☆ १:१ १:११ मत्तय १३:५५; मार्क ६:३; प्रेषित १५:१३; गलती १:१९

☆ १:१० १:१० कारण त्या जंगली फुलना गवतनामायक नष्ट व्हातीन यशया ४०:६,७

13 कोणी परिक्षा व्हातांना, देवनी माले मोहमा टाकं, अस त्यानी म्हणाले नको कारण देवले वाईट गोष्टीसना मोह व्हस नही अनी तो स्वतःबी कोणले मोहमा टाकस नही.

14 तर प्रत्येक माणुस आपला वासनाघाई वढाई जाई अनी भुल व्हयेलना मायक मोहमा पडस.

15 मंग वासना गर्भवती व्हईसन पापले जन्म देस अनी पाप पक्क व्हावर मरणले जन्म देस.

16 मना प्रिय भाऊ अनी बहिणीसवन फसु नका,

17 प्रत्येक चांगली देणगी अनं प्रत्येक पुर्ण दान देवकडतीन शे ते ज्याले विकार नही अनी जो सावली बदलस तसा बदलस नही असा प्रकाशाना देवबापकडतीन उतरस.

18 त्यानी आपला ईच्छातीन अनी सत्य वचनघाई आमले जन्म दिधा, यानाकरता की आपण त्याना बनाडेल वस्तुमातील प्रथम फळ व्हावे पाहिजे.

ऐकनं अनी करनं

19 मना प्रिय भाऊ अनी बहिणीसवन तुमले हाई समजस यामुये प्रत्येक मनुष्य ऐकाले तेज, बोलावे सावकाश अनी रागले मंद असा र्हावाले पाहिजे.

20 कारण मनुष्यना रागघाई देवना न्यायना कामे व्हतस नही.

21 यामुये सर्व मलिनता भरीसन येल वैरभाव सोडीन तुमना जिवननं तारण कराले समर्थ असा रुजेल वचन सौम्यतातीन स्विकाराले पाहिजे.

22 फक्त ऐकणारा राहू नका; असामुये तुमनी फसवनुक व्हस म्हणीसन वचननामायक आचरण करनारा बना.

23 कारण जर कोणी वचन नुसता ऐकीसन तसा कामे करस नही तर तो आरसामा आपलं तोंड दखणारा माणुसना मायक शे.

24 तो स्वतःले दखीसन तठेन निधी जास अनी आपण कसा व्हतुत हाई तवयच ईसरी जास.

25 पण स्वतंत्रना पुर्ण नियमवर नजर टाकीन जो त्यानाकडे लक्षपूर्वक दखी र्हास तो ऐकीन ईसरनारा असा नही व्हता कामे करनारा व्हस. अनं आपला कामसमा धन्यता मिळाडस.

26 मी धर्मचरण करनारा शे, अस कोणले वाटत व्हई अनी तर तो आपला जिभले आळा घालस नही अनी आपला मननी भुल करी लेस तर त्यानं धर्मचरण व्यर्थ शे.

27 देवबाप याना नजरमा शुध्द अनं निर्मळ धर्मचरण म्हणजे अनाथ अनी विधवा यासनी त्यासना संकटमा ईचारपुस करनं अनी स्वतःले जगना कलंकपाईन संभाळीन ठेवनं हाई शे.

2

श्रीमंत अनी गरीबससंगे वागनं

1 मना भाऊ अनी बहिणीसवन, गौरवशाली प्रभु म्हणजे आपला प्रभु येशु ख्रिस्त यानावर ईश्वास ठेवणारा तुमनामा तोंड दखीन वागनं असाले नको.

2 समजा सोनानी अंगठी घालेल अनी भडक कपडा घालेल असा एखादा श्रीमंत माणुस तुमना सभास्थानमा वना अनी भिकारीना कपडा घालेल एक गरीब बी वना;

3 तुम्हीन भडक कपडा घालेल माणुसकडे दखीसन म्हणतस हाई चांगली जागा शे आठे बठा, अनी गरीबले म्हणतस तु आठे उभा रूहाय किंवा मना पायसकडे खाल बठ.

4 तर तुम्हीन आपसमा भेदभाव करा की नही अनी वाईट ईचार करनारा तुम्हीन व्हयनात की नही.

5 मना प्रिय भाऊ अनी बहिणीसवन ऐका! लोकसना नजरमा ज्या गरीब त्या ईश्वासमा श्रीमंत व्हावाकरता अनी जे राज्य देवनी आपलावर प्रिती करनारासले देयल शे त्यानं वारीस व्हावाकरता त्यानी निवडेल शे की नही?

6 पण तुम्हीन गरीबसना अपमान करेल शे, श्रीमंत लोके तुमनावर जुलूम करतस की नही? अनी त्या तुमले न्यायसभामा वढीन नेतस की नही?

7 ज्या उत्तम नावमुये तुमले नाव भेटेल शे त्यानी त्या निंदा करतस की नही?

8 तरी तुम्हीन स्वतःनामायक आपला शेजारीसवर प्रिती कर, या शास्त्रलेखमाधील राजमान्य नियम तुम्हीन पुरा पाळतात तर बरं करतस.

9 पण जर तुम्हीन तोंड दखीन वागतस तर पाप करतस अनी नियमशास्त्रनं उल्लंघन करनारा असा दोषी ठरतस.

10 जो कोणी पुरं नियमशास्त्र पाळीन एक नियमबद्दल चुकस तो सर्वासबद्दल दोषी व्हस.

11 व्यभिचार करू नको अस ज्यानी सांगं त्यानीच नरहिंसा करू नको हाई पण सांगं, तु व्यभिचार नही करता नरहिंसा करस तर नियमशास्त्र उल्लंघन करनारा व्हस.

12 जो नियम आमले स्वतंत्र करस त्यानुसार तुमना न्याय ठराव शे अस समजीन बोला अनी वागणुक करा.

13 कारण ज्यानी दया करी नही त्याना न्याय दया बिना व्हई. दया न्यायवर विजय मिळावस.

ईश्र्वास अनं कर्म

14 मना भाऊ अनी बहिणीसवन, माले ईश्र्वास शे अस कोणी म्हणत व्हई अनी तो तसा वागत नही व्हई तर त्यापाईन काय लाभ? तो ईश्र्वास त्यानं तारण कराले शक्तीमान शे का?

15 भाऊ किंवा बहिणीसकडे खराब कपडा व्हतीन; त्यासले रोजना जेवणनी वनवन शे.

16 अनी तुमनामाधील कोणी त्यासले म्हणस शांततामा जा, तुमले पुरेसा कपडा मिळोत, अनी खाई पीसन तृप्त व्हा. पण त्याना शरिरले पाहिजे ते त्याले तुम्हीन देतस नही तर त्यापाईन काय लाभ?

17 यानामायक ईश्र्वाससंगे जर कामे नहीत तर तो जात्या निजींव शे.

18 कोणी म्हणी तुले ईश्र्वास शे अनी माले कर्म शेतस, कर्मशिवाय तु आपला ईश्र्वास माले दखाडं अनी मी आपला ईश्र्वास मना कर्मसघाई तुले दखाडसु.

19 काय तुले ईश्र्वास शे का एकच देव शे, हाई बरं करस, भूतं बी ईश्र्वास धरतस अनी कापतस.

20 अरे, असंमजसं मनना मनुष्य कामेसशिवाय ईश्र्वास बिनकामना शे, हाई समजी लेवानं तुले पाहिजे का?

21 आपला बाप अब्राहाम यानी आपला पोर्या इसहाक याले अग्नीवेदीवर अर्पण करं यामा तो त्याना कामसघाई नितीमान ठरना नही का?

22 ईश्र्वास त्याना कर्मससंगे कृती करी राहीता अनी कर्मसघाई ईश्र्वास पुरा व्हयना हाई तुले दखास.

23 *अब्राहामनी देववर ईश्र्वास ठेवा अनी हाई त्याले नितीमान अस मोजामा वनं अनी त्याले देवना मित्र म्हणामा वनं. हाऊ शास्त्रलेख पुरा व्हयना.

24 तर मंग फक्त ईश्र्वासनाद्वारा नही तर कृतीघाई मनुष्य नितीमान ठरस. हाई तुम्हीन दखतस.

25 तसच राहाब वेशानी बी जासुदसना पाहणचार करा अनं त्यासले दुसरी वाटतीन धाडी दिधं. या तिना कर्मसनी ती नितीमान ठरनी नही का?

26 जसं शरिर आत्माविना निजींव शे तसा ईश्र्वास बी कर्मसशिवाय निजींव शे.

* 2:23 2:23 उत्पत्ति. 15:6 यशया. 41:1

3

जिभ ताबामा ठेवनं

1 मना भाऊ अनी बहिणीसवन तुम्हीन जास्त शिक्षक व्हवु नका कारण तुमले माहीत शे की आपला जास्त कडकपणातीन न्याय व्हई.

2 आपण सर्वाजन बराच गोष्टीसबदल चुकतस जर कोणी बोलामा चुकस नही तर तो पुर्ण मनुष्य, तो सर्व शरीर बी ताबामा ठेवु शकस.

3 घोडासनी आपली आज्ञा पाळायला पाहिजे म्हणीसन आपण त्याना तोंडमा लगाम लावतस त्यामुये त्याले जठे पाहिजे तठे आपले फिरावता येस.

4 जहाजसंले बी दखा त्या ईतला मोठा शेतस अनं मोठा वाराघाई लोटाई जातस, तरी चालवणारानी ईच्छा रूहास तिकडे तो त्याले फिरावस.

5 तशीच जिभ बी धाकलस अवयव व्हईसन बी मोठ्या गोष्टीसनी फुशारकी मारस.

तर ईचार करा, कितला धाकला ईस्तव कितला मोठा जंगलले चेटाडस.

6 जिभ बी आग शे, ती अनितीनं भुवन शे, आपला अवयवात सर्व शरीर मळीन करनारा अवयव जिभ शे, ती बहुचक्रले आग लावणारी अनी नरकघाई चेटाडेल अशी शे.

7 श्वापदे, पक्षी, सरपटणारा प्राणी अनी समुद्रमाधला जीव या प्रत्येकना स्वभाव मनुष्य स्वभावना ताबामा व्हायेल शेतस, अनी व्हई राहीनात,

8 पण मनुष्यसपैकी कोणी बी जिभले ताबामा कराकरता समर्थ नही, ती शांतीरहीत शे अनी दुष्ट शे अनं प्राणघातक विषघाई भरेल शे.

9 तिनाद्वारे प्रभु पिता यानी आपण स्तुती करतस अनी देवना प्रतिमानामायक बनाडेल माणुसले तिनाचद्वारे शाप पण देस.

10 तिनाच तोंडतीन स्तुती अनी शाप बी निंघस, मना भाऊ अनी बहिणीसवन अशी गोष्ट व्हणं चांगलं नही.

11 झराना एकच छिद्रामातीन गोड पाणी अनी कडु पाणी निंघस का?

12 मना भाऊ अनी बहिणीसवन, अंजिरले जैतुनना फळं अनी द्राक्षवेलले अंजिर येतीन का? तसच खारा झरामातीन गोड पाणी निंघाव नही.

स्वर्गीय बुध्दी

13 तुमनामा बुध्दीमान अनं समजदार कोण शे, त्यानी बुध्दीपाईन भेटेल लिनतातीन अनी चांगली वागणुकतीन आपला कामे दखाडाले पाहिजे.

14 पण तुमना मनमा जळाऊपणा, कडुपणा, स्वार्थीपणा व्हई तर स्वतःना बुध्दीवर गर्व करीसन सत्यले नाकास नका.

15 हाई बुध्दी वरतीन उतरस नही तर ते संसारिक, शारीरिक, अनं सैतानी शे.

16 कारण जठे मत्सर अनी स्वार्थीपणा र्हास तठे अव्यवस्था अनी सर्व प्रकारना वाईट गोष्टी व्हतस.

17 वरतीन येणारी बुध्दी हाई मुळपाईन शुध्द र्हास शिवाय ते शांतीप्रिय, नम्र, समजी लेनारी दया अनं चांगला फळे यासघाई पुर्ण, अपक्षपाती, प्रामाणिक अस शे,

18 ज्या शांतता करनारा शेतस त्या शांततेमा बी पेरतस अनं न्यायीपणनं पिक मिळवतस.

4

जगसंगे मैत्री

1 तुमनामा लढाया अनी भांडणं कोठेन येतस? तुमना मनमा ज्या वासना लढाई करतस त्याकडतीन की नही?

2 तुमले पाहिजे पण तुमले भेटस नही, म्हणीन तुम्हीन घात करतस, तुमनी मनपाईन ईच्छा र्हास पण तुमले काही भेटस नही यामुये तुम्हीन भांडतस अनी लढाई करतस, तुम्हीन देवकडे मांगतस नही यामुये तुमले भेटस नही.

3 तुम्हीन मांगतस पण तुमले भेटस नही, कारण तुम्हीन वाईट उद्देशतीन मांगतस, म्हणजे आपला ऐश आरामकरता खर्च कराले मांगतस.

4 अहो, अईश्वासी लोकसवन, जगनी मैत्री हाई देवसंगे वैर शे. हाई तुमले माहीत नही काय? जो कोणी जगना मित्र व्हावेले दखस तो देवना वैरी ठरेल शे.

5 जो आत्मा त्यानी स्वतःमा ठेवा तो असा हेवा करस का ज्यानं प्रतिफळ जळाऊपणा शे, हाई शास्त्रनं म्हणनं व्यर्थ अस तुमले वाटस काय?

6 तो जास्तीनं कृपादान देस, यामुये शास्त्र म्हणस, देव गर्विष्ठसना विरोध करस, अनी गरीबसले कृपादान देस.

7 यामुये देवना अधीन व्हई जा अनी सैतानले आडवा व्हा; म्हणजे तो तुमनापाईन पळी.

8 देवजोडे या म्हणजे तो तुमनाजोडे ई, पापी लोकसवन, जिवन शुध्द करा, अहो विबुध्दीना लोकसवन, आपला मनसले पवित्र करा.

9 कष्टी व्हा, शोक करा, रडा, तुमना हसाना शोक अनी तुमना आनंदना विशाद होवो.

10 प्रभुना समोर नम्र व्हा म्हणजे तो तुमले उंच करी.

ईश्यासी भाऊसनं न्याय कराबइल ताकिद

11 भाऊ अनी बहिणीसवन, एकमेकस विस्धद बोलु नका, जो बंधुसविस्धद बोलस अनी आपला बंधुले दोष लावस तो नियमनाविस्धद बोलस अनी नियमले दोष लावस, जर तु नियमले दोष लावस तर तु नियम पाळणारा नही तर न्यायाधीश शे.

12 नियमकर्ता अनी न्यायाधीश असा एकच शे, तो तारण कराले अनी नाश कराले समर्थ शे, आपला शेजारीना न्याय करनारा तु कोण?

बढाई माराले नको म्हणीसन इशारा

13 अहो, ज्या तुम्हीन म्हणतस आपण आज सकाय अमुक शहरले जावुत, तढे एक वरीस राहत अनी व्यापार करीसन पैसा कमाडूत,

14 त्यामा तुमले सकायनं समजस नही तुमनं आयुष्य काय शे? तुम्हीन वाफ शेतस ती थोडा येळ दिसस अनी मंग दखास नही.

15 अस नही म्हणता प्रभुनी ईच्छा व्हई तर आपण जगीसन हाई किंवा ते काम करुत अस म्हणा.

16 आते तुम्हीन स्वतः फुशारकी मारतस अनी गर्व करतस, असा प्रकारनी सर्व फुशारकी वाईट शे.

17 चांगलं करनं समजस तरी जो तसा वागस नही. त्याले ते पाप शे.

5

श्रीमंतसले इशारा

1 अहो श्रीमंतसवन, जे कष्ट तुमले व्हाव शे त्यानाबइल आक्रोश करीसन रडा.

2 ✧ तुमनं धन नष्ट व्हायेल शे, अनं तुमना कपडासले कुज लागेल शे.

3 तुमनं सोनं अनी तुमनी चांदी यासले जंग चढेल शे, त्याना तो जंग तुमना विस्धद साक्ष व्हई, अनी तो अग्नीनामायक तुमनं शरीर खाई, शेवटला दिनसकरता तुम्हीन धन गोया करेल शे.

4 ज्या कामगारसनी तुमनी शेतीमा कापणी करी त्यासनी तुम्हीन अडकाई ठेयल मजुरी वरडी राहीनी. अनी कापणारासना आरोळ्या सेनाधीश प्रभुना कानवर जायेल शे.

5 तुम्हीन पृथ्वीवर चैनबाजी अनी विलास करेल शे, वधना रोज तुम्हीन आपला मननी तृप्ती करेल शे.

6 धार्मीकले तुम्हीन दोषी ठराय, त्याना घात करा, तो तुमले आडावस नही.

धीर अनी प्रार्थना

7 अहो भाऊ अनी बहिणीसवन, प्रभुना आगमन पावत धीर धरा, दखा, शेतकरी भुमीना मोलवान पीकनी वाट दखतांना त्याले पहिला अनी शेवटला पाऊस भेटापावत त्यानाबद्दल तो धीर धरस.

8 तुम्हीन बी धीर धरा, आपला मनसले स्थिर करा, कारण प्रभुनं आगमन जोडे येल शे.

9 भाऊ अनी बहिणीसवन तुम्हीन दोषी ठराले नको म्हणीसन एकमेकसवर चिडीसन कुरकुर करू नका, दखा, न्यायाधीश दारजोडे उभा शे

10 भाऊ अनी बहिणीसवन, ज्या संदेष्टा प्रभुना नावतीन बोलनात त्यासनं दुःख सहन अनी धीर यानाबद्दल किता ल्या.

11 ज्यासनी सहन कर त्यासले आपण धन्य म्हणतस, तुम्हीन ईयोबना धीरबद्दल ऐकेल शे, अनी प्रभुकडतीन जो त्याना शेवट व्हयना तो दखेल शे यावरतीन प्रभु फार कनवाळू अनी दयाळू शे हाई तुम्हीन दखेल शे.

12 ☆मना भाऊ अनी बहिणीसवन, मुख्य शप्पथ वाहू नका, स्वर्गनी, पृथ्वीनी किंवा कोणती बी दुसरी शप्पथ वाहू नका, तुम्हीन दोषी ठराले नको म्हणीसन तुमले हो, म्हणनं व्हई तर “हो” म्हणा, “नही” म्हणनं व्हई तर “नही” म्हणा.

ईश्वरासनी प्रार्थनानं सामर्थ्य

13 तुमनापैकी कोणी दुःख भोगी राहीनात का? त्यासनी प्रार्थना करानी, कोणी आनंदमा शे का? त्यानी स्तोत्र म्हणाले पाहिजे.

14 ☆तुमनापैकी कोणी आजारी शेतस का? त्यासनी मंडळीना वडील लोकसले बलावानं अनी त्यासनी प्रभुना नावतीन त्याले तेल लाईसन त्यावर हात ठिसन प्रार्थना कराले पाहिजे.

15 ईश्वरासनी प्रार्थना रोगीले वाचाडी. प्रभु त्याले ऊठाडी, अनी त्यानी पाप करेल व्हईत तरी त्याले क्षमा व्हई.

16 यामुये तुम्हीन निरोगी व्हावे पाहिजे म्हणीसन एकमेकसनी पापं एकमेकससमोर कबुल करीसन एकमेकसकरता प्रार्थना करा. धार्मीकसनी प्रार्थना कार्य कराले बरीच प्रबळ रहास.

17 एलिया आमनामायक स्वभावना वहता, त्यानी पाऊस पडाले नको अशी आग्रह करीसन प्रार्थना करी, अनी साडेतीन वरीस पृथ्वीवर पाऊस पडना नही.

18 परत त्यानी प्रार्थना करी, तवय आकाशनी पाऊस पाडा, अनी भुमीनी आपलं फळ उगाडं.

19 मना भाऊ अनी बहिणीसवन, तुमनापैकी कोणी सत्यपाईन बहीकी गया अनी त्याले कोणी माघारे फिरायं.

20 ☆तर पापी माणुसले त्याना भ्रांतीमय वाटपाईन फिरवणारा तोच त्याना जीव मरणपाईन तारी, अनं पापसनी रास झाकी अस त्यानी हाई ध्यानमा लेवाले पाहिजे.

प्रेम संदेश

**The Gospels of Matthew and Mark in the Ahirani
language of India. Ahirani: प्रेम संदेश (Bible)**

copyright © 2023 The Word for the World International and Ahirani Christi
Iswari Mandli, Sakri, Dhule, Maharashtra

Language: अहिराणी (Ahirani)

Contributor: The Word for the World International

प्रेम संदेश

जुना करार, 2025

The Old Testament Books in Ahirani Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

6e2997e4-b06d-5108-bd98-2b3ff67a6f92